


霍廷軍紀畧



建軍紀念



霆軍紀略卷七

銅梁陳昌世五編輯

門人

吳樹棠
王澤

全校字

甲子同治三年

二月鮑公駐軍東壩進規句容丹陽備剿金陵援賊

曾公國荃屯兵金陵將及兩年上月攻克鍾山偽天保城
因調派各軍分扼太平神策門城圍遂合至是用雲梯猛
攻未得手曾文正公以金陵圍師不滿五萬偪困數十萬
賊深慮窮寇衝突致蹈和張諸帥覆轍因留楊公岳斌暫

緩江西之行仍紮金陵江面以斷接濟而鮑公一軍駐扼東壩羣賊望風遠避久無戰事時江撫沈文肅公陳奏機宜文正奉

寄諭鮑超是否仍在東壩東壩固係入蘇門戶能否另易他將駐守而以鮑超之軍分路進攻俾賊匪首尾不能相顧著該大臣速籌辦理蘇撫李公鴻章奏陳力攻常州機宜文正又奉

寄諭曾國藩當檄飭鮑超東壩溧水防兵前後兜擊以期聲勢聯絡文正因令鮑公分營進取句容丹陽一帶尋致

鮑公書云聞僞忠王以血書求援於湖州賊目侍堵等逆侍堵許以三月間來援金陵舍弟所部分紮百餘里汎地太廣圍城賊則有餘打援賊則不足如侍堵果來務望閣下妥慎禦之如句容已克則請閣下親駐句容一以防侍堵來援之賊一以防克城後大股衝出之賊句容最爲扼要之區侍堵來時無句溧兩處駐足斷無能久之理閣下雖不打援賊而舍弟軍已受福矣若句容未克則貴軍仍須回駐東壩侍堵來時應請閣下帶行隊至溧水等候賊撲舍弟之後閣下卽抄賊之後亦如在高祖山時出行隊

打涇縣也做處札萬方伯爲貴軍辦米萬石閣下可派員至泰山守催以期迅速

三月鮑公督軍攻破三岔賊卡克復句容縣城生擒僞王項大英方成宗遂克寶堰賊壘收復金壇縣城

句容踞逆僞守王方海宗聞鮑公之軍將至在金壇寶堰等處糾結項大英方成宗兩大股同守句容以拒初五日鮑公親督各營冒雨疾馳行過溧水攻三岔賊卡破之初六日軍次距句容十里之塔岡正修築營寨城中突出三四萬眾密布山岡將乘我立營未定悉銳猛撲鮑公卽令

周有勝王衍慶鄭德亮等七營直前迎敵而以宋國永帶
領譚勝達易昌煥段福唐仁廉等八營攻其左以馮標帶
領劉順隆何田玉李文益孫開華等八營攻其右搏戰至
數時賊不稍卻鮑公令黃海清唐得勝閃連陞劉得勝蔣
魁南等各率騎隊分兩路直抄賊後而以婁雲慶步隊佐
之賊見歸路將斷大譁欲遁我軍且戰且進逼近城下殲
賊數千附城四壘之賊相顧錯愕一圍散走鮑公料城賊
膽落利在速圖乃飭各營徹夜環攻漏至四下忽見城東
一角火光燭天知內變已作急引軍東向而賊已啟南門

傾巢衝出諸將士乘勢截勦斬馘尤多並縛二酋以獻俄有內應之翟本邦等七人叩馬通報指擒賊而言曰此僞翰王項大英僞烈王方成宗也鮑公遂於初七日黎明率軍入城生降五萬餘人悉遣散之檻送二酋至安慶經曾文正公訊明正法寶堰者距句容四十五里南通金壇北達丹陽有五堅壘在焉句容逆首方海宗遁至此與壘賊僞顯王袁得厚合謀阻進兵之路初九日鮑公率隊前往摩壘而攻賊但穴牆施礮堅閉不出是夜鮑公派婁雲慶唐得勝等潛伏壘下又派馮標鄒連陞胡良作等五路併

進萬鎗齊發賊漸不支各軍負草填濠爭躍入壘一壘旣破眾壘盡亂壘中逸出之賊又經伏兵掩殺蹙逼入河者無算海宗得厚遁走金壇丹陽奪獲大礮二十一尊礮船旗幟多件文正奏言句容一城與金壇丹陽鼎足而三實爲金陵之左輔鮑超率師進剿一戰克之並執二僞王毀五賊壘而金陵亦有日孤之勢裨益全局厥功甚偉奏入奉

上諭賊匪踞守句容縣城負隅抗拒提督鮑超督兵進剿立將句容縣城克復其實堰賊壘復經鮑超率隊攻破剿

辦甚屬得手所有尤爲出力之總兵馮標譚勝達唐仁廉
均著交軍機處記名遇有提督缺出請旨簡放周有勝易
昌煥李文益均著賞加提督銜王衍慶劉順隆張玉田均
著交軍機處存記遇有總兵缺出先行提奏參將黃海清
著以副將仍留安徽儘先補用並賞給彥勇巴圖魯名號
副將孫開華著賞加總兵銜並賞給擢勇巴圖魯名號陳
永康羅運昌均著無論四川推題副將缺出先行補授羅
運昌並賞加總兵銜段福著遇有副將缺出先行補授並
賞加總兵銜參將唐得勝著以副將儘先補用並賞加總

兵銜游擊洪容海著以參將儘先補用並賞加副將銜其餘在事出力員弁准其查明彙案保獎陣亡知府田芬參將陽茂泰都司易新勝黃昌陳光謨守備向忠國均著從優議卹鮑公以降人翟本邦張宏發楊文明龔福全張明道張志寬童得勝潛爲內應冒險圖功牒文正奏給守備虛銜時馮公子材奏陳進規丹陽機宜文正奉

寄諭句容與丹陽互爲犄角此次鮑超督軍進逼一戰而下堅城勦辦甚爲迅速深堪嘉尙該軍出力人員及鎮城會勦之軍著曾國藩查明彙案保奏惟句容餘賊竄往何

處未據馮子材等奏明著飭鮑超速行追剿丹陽之賊此時必聞風喪膽攻剿更易爲功曾國藩卽檄鮑超移得勝之師直擣丹陽使該逆不遑喘息富明阿卽飭該總兵與鮑超之師南北夾擊迅圖攻拔勿稍遲延賊之分踞金壇丹陽也計與常州相犄角丹陽一路有富明阿公及馮公會軍進攻之其金壇一路灌濠成河自西洋村以達城根凡隔小河數十道十二日鮑公親督所部渡河競進將壁於城下俄得馮公書以丹陽賊勢綦重乞移師助剿鮑公卽派婁雲慶周有勝等率馬步七營留住金壇城外而自

率十四營暫回句容十六十七等日金壇之賊擁眾出城
疊撲我營雲慶力戰卻之鮑公回句容後接馮公催勦丹
陽之書又奉文正力保東壩之檄十九日乃飛馬傳知金
壇城外各營盡行撤回句容以備分援二處之急鮑公甫
傳令轉念金壇撤營之時恐城賊追攝我後或致疏失乃
親率各營偃旗息鼓於二十日折回西洋村備擊金壇出
巢之賊遂於後茅山一帶面面設伏令周有勝曹志忠等
四營伏茅山之左而以黃海清劉得勝等騎隊左之令唐
仁廉李文益等四營伏於茅山之右而以婁雲慶熊高望

等騎隊佐之金壇逆酋盛明友聞官軍撤隊卽糾城賊二萬餘眾悉力窮追過茅山正向田隴村落間迤邐而進鮑公揮令張玉田羅運昌張遇春楊友益等突出中路賊以洋鎗小隊蜂擁來迎遇春於羣子如雨之中衝入賊隊賊爲披靡鮑公催動號鼓伏兵四起旌旗滿山海清得勝等驅馬入陣截賊數段雲慶亦率高望等從山後抄出橫斷歸路賊倉皇失措棄械滿道各軍追殺五十餘里逼至金壇西門敗賊不敢進城而城賊亦啟南門急向三仙關遁走我軍正跟蹤追勦間乃丹陽小路出賊一股自北而南

循西洋村以至店埠連互不斷勢將出我後路鮑公傳知
各將士暫不入城分軍縱擊賊受重創竄遁據獲賊供此
常州城外敗匪取道丹陽欲由建平廣德以上竄者也鮑
公於是揚隊西洋村以備續至之賊一面移軍金壇文正
奏言金壇雖彈丸小邑而旁接丹陽內蔽常州亦賊所必
爭之地鮑超因調隊暫回句容恐城賊躡追爲其所乘引
軍設伏計破此城不特常州丹陽輔車相依卽金陵老巢
愈成孤立實屬有裨大局奏入奉

上諭此次官軍進攻金壇誘賊出戰收復縣城勦辦甚爲

得手仍著將敗殘餘匪迅速殲除毋任竄逸游擊張遇春
馳入賊陣奮不顧身著以副將儘先補用其餘出力員弁
兵勇卽著彙入東壩句容各案查明保奏其力戰陣亡之
參將鮑昌齡都司宋連陞王正禮均著交部從優議卹金
壇甫克文正奉

寄諭金壇一城已爲鮑超攻拔丹賊更必聞風喪膽著會
國藩卽飭該提督迅移得勝之兵與鎮揚各軍會攻丹陽
以期迅拔兩邑連下常賊之勢益孤攻剿更易得手

四月駐防東壩之霆軍截擊丹陽竄賊大破之

句容金壇旣克鮑公自駐句容而以部將譚勝達分統東壩防營乃丹陽經馮公子材等克復敗賊僞顯王等糾餘黨三四萬眾分股圖犯東壩高滄十三日鮑公引軍自句容出溧水正欲馳諭譚勝達等率東壩各營先勦大頭山一股仍親督騎隊專勦漆橋一股行抵漆橋而賊已合股併向東壩一路十四日譚勝達商同鄧訓誥李文益曾成武黎光照等營募食出隊天未曙也少頃師次安興遙見山谷中賊旗林立若遠若近迎面撲來諸將士奮勇直前然鎗環擊賊乃全無怯志前股少卻後股繼至往來猛鬪